



Polítika Sosa Armas ba PSIK no Nia Kontrolu

Mehein Nia Lian Nú. 151, 29 Dezembru 2020



Fundaasaun Mahein (FM)

Website: www.fundasaunmahein.org

2020



Kontiudu sira

Kontiudu sira	2
Introdusaun	3
Metodolojia	3
Polítika Sosa Armas ba PSIK	3
Natureza PSIK nian	4
Presedente ba Institusaun seluk	5
Armas ne'ebé Sosa ona ba PSIK	6
Regra Uza Forsa no Armas	8
Rekomendasaun	10
Bibliografia	11

Introdusaun

Polícia Científica de Investigação Criminal (PCIC/PSIK) hanesan institusaun públiku ida ne'ebé nia natureza sientifika halo investigasaun ba kazu sira ne'ebé grave, organizadu ka kompleksa. Maske nune'e, inisiu harii institusaun ne'e hahu ho polêmika, parte barak la aseita no konsidera PSIK dupla deit servisu institusaun seluk nian hanesan Polícia Nacional Timor-Leste (PNTL). Tamba Timor-Leste Nasaun kiik la presiza institusaun barak-barak no kopia modelu polísia ne'ebé eziste iha rai seluk hanesan Polícia Judiciaria iha Portugal.¹

Polêmika relasiona ho PSIK la to'o deit iha ne'e, iha tinan 2017 Governu aprova tan Diploma Ministerial ida hodi aprova tipu calibre arma fogu ba PSIK ho tipu calibre pistola 9x19 mm². Parte barak kontinua la aseita no polêmika hetok aumenta ligadu armas ne'ebé sosa ba PSIK. Maske nune'e, desizaun ikus husi Governu kontinua sosa armas no entrega ona ba PSIK.

Nune'e relatóriu ida ne'e nia objetivu atu fó hanoin ba parte hotu tau matan ba armas ne'ebé daudaun ne'e utiliza husi membru PSIK sira. Iha âmbito utilizasaun armas tenke hala'o tuir lei, regulamentu ka regra sira utilizasaun nian.

Metodolojia

Metodolojia ne'ebé adopta iha relatóriu ida ne'e maka revizaun inisial ba dokumentu ofisial sira hanesan lei, dekretu-lei, diploma ministerial, regulamentu no relatóriu sira husi Fundasaun Mahein (FM) rasik. Nune'e faze ikus husi prosesu ne'e, peskizador sira halo análiza no konkluir relatóriu ida ne'e liu husi metodu ne'ebé FM adopta maka *Security Sector Discussion* (SSD). SSD hanesan diskusaun ne'ebé involve peskizador sira husi FM nian hodi diskute no análiza ba materia sira ne'ebé relasiona ho relatóriu ne'e nia no hamosu rekomendasaun sira.

Política Sosa Armas ba PSIK

Dekretu-Lei N.º 21/ 2014 de 6 de Agosto 1.^a Alteração ao Decreto-Lei n.º 15/2014, de 14 de Maio, Orgânica PSIK, hatuur PSIK hanesan korpu superiór polísia kriminál, ne'ebé organiza tuir ierarkia iha Ministru Justisa nia mahon ho autonomia administrativa, finanseira no patrimoniál. Husi dispozisaun Lei kriaun PSIK nian difine mos uzu no porte arma husi membru PSIK sira. Tuir artigu 20 autoridade polísia kriminál sira, pesoál investigasaun kriminál no pesoál ausiliár investigasaun kriminál nian iha direitu ba uzu no porte ba kilat servisu nian, calibre no tipu aprovalu husi diploma ministerial Ministru Justisa nian.

Husi dispozisaun artigu 20 nian, Ministériu Justisa iha loron 24 Maiu 2017 hasai ona diploma ministerial ida hodi define kona-bá arma fogu ne'ebé utiliza husi pesoal PSIK sira

¹ Relatóriu Fundasaun Mahein (2014). Política Kriaun Polísia Sientifika Investigasaun Kriminál (PSIK) Parseiru no Ameasa ba Instituisaun Siguransa. Disponivel iha nee: http://www.fundasaunmahein.org/wp-content/uploads/2014/09/MNL_Nu.86_25092014_PSIK.pdf

² Diploma Ministerial N.º 33/2017 de 24 de Maio Aprova o Tipo e o Calibre das Armas de Fogo de Serviço do Pessoal da Polícia Científica de Investigação Criminal (PICPSIK).

maka Diploma Ministerial N.º 33/2017 de 24 de Maio Aprova o Tipo e o Calibre das Armas de Fogo de Serviço do Pessoal da Polícia Científica de Investigação Criminal. Diploma ne'e nia objetu aprova tipu no calibre arma fogu ne'ebé bele utiliza husi pessoal PSIK, tuir termu sira iha lei, nomos regra sira akizisaun, distribuisaun no uzu nian. Ho Diploma Ministerial ne'e define tipu calibre ba armas fogu ne'ebé pessoal PSIK iha direito uza ho tipu pistola calibre 9 X 19 mm.

Natureza PSIK nian

Relasiona ho armas ne'ebé aprova no sosa ona ba PSIK, sesaun ida ne'e buka kompriende natureza PSIK nian ligadu ho polítika sosa armas ka pistola. PSIK nia natureza sientífika, ho apoiu laboratóriu polísia sientífika nian, nu'udar sentru prinsipál liu ne'ebé fó apoiu ba investigasaun kriminal no garantia ne'ebé metin no rai didi'ak buat hirak ne'ebé sai nu'udar prova, no responsável ba rekolla, tratamentu no ezame ba vestíjiu krime nian no perísia forense, hodi hatán buat hotu-hotu no hatán nafatin ba nesesidade investigasaun kriminal sientífika no ho konfiansa. Nune'e PSIK maka halo deit investigasaun ba krime grave, organizada ka kompleksa³.

Misaun husi PSIK nian maka atu fó tulun ba autoridade judisiál sira, dezenvolve no promove asaun prevensaun, detesaun no investigasaun hirak ne'ebé hola parte iha ninia kompetênsia ka hirak ne'ebé autoridade judisiál competente sira delega ba nia, hanesan asegura sentralizasaun nasional ba informasaun kriminal. Nomos ninia koadjuvasaun ba autoridade judisiariu sira, PSIK fó tulun ba autoridade judisiál sira iha prosesu sira ne'ebé iha relasaun ho krime sira ne'ebé delega ba nia atu halo investigasaun ka bainhira husu ba nia atu foti medida sira ne'ebé iha molok julgamentu no rekere kuiñesimentu ka meu tékniku espeisial sira. Iha prosesu penal PSIK sei atua iha dresaun nia mahon no sei la'ò tuir Ministériu Públiku ka júis prosesu nia lala'ok⁴.

Haree husi natureza, misaun no koadjuvasaun PSIK nian hanesan "polísia sientífika" tuir definisaun iha leten iha ambitu investigasaun kriminal nian signifika katak ita tenke dezenvolve liu investigasaun ida sientífika. Tamba interpretasaun ne'ebe "sala" nune'e ninia dezenvolvimentu mos sees husi ninia natureza, misaun no koadjuvasaun lolos. Katak ita la dezenvolve PSIK hanesan institusaun investigasaun "investigasaun sientífika" maibe dezenvolve liu "servisu polisial ne'ebé uza forsa ho armas"⁵.

Pratikamente Governu liu husi Ministériu Justisa sosa ona armas ba PSIK. Servisu todan ida ba Governu oinsa prepara mekanismu sira kontrolu nian no ba PSIK rasik kontrola ho rigor kona-bá ninia utilizasaun. Maske nune'e, nesesariu liu investimentu ba rekursu umanu liu-liu kuiñesimentu no tekniku investigasaun nian no ho apoiu ekipamentu sira ne'ebé modernu tuir padraun ida sientífika nian hanesan, laboratoriu hodi halo testu ka exame ba objetu sira krime nian.

³ Decreto-Lei N.º 21/ 2014 de 6 de Agosto 1.ª Alteração ao Decreto-Lei n.º 15/2014, de 14 de Maio, Orgânica Polícia Científica de Investigação Criminal (PCIC)

⁴ Decreto-Lei N.º 21/ 2014 de 6 de Agosto 1.ª Alteração ao Decreto-Lei n.º 15/2014, de 14 de Maio, Orgânica Polícia Científica de Investigação Criminal (PCIC)

⁵ Relatório Fundasaun Mahein (2019). Sosa Kilat ba PSIK Atu Tiru ka Investiga? Disponível iha ne'e: <http://www.fundasaunmahein.org/2019/05/16/sosa-kilat-ba-psik-atu-tiru-ka-investiga/>

Exemplu, kazu kontentor 9 (sia) materia prima PCC (*Paracetamol, Caffein, Carisoprodo*) ne'ebé autoridade seguransa prende iha Janeiru 2018, lolos ida ne'e Timor-Leste ho institusaun ne'ebé barak-barak bele halo ona investigasaun rasik ka exame ba substansia ka materia prima PCC. Maibe tamba Timor-Leste seidak iha laboratoriu propriu hodi halo testu ka exame ba substansia hirak ne'e. Nune'e tenke utiliza kooperasaun sira ne'ebé iha hodi ba testu iha Indonézia⁶.

Ho ida ne'e, nesesariu tebes atu dezenvolve PSIK iha kapasidade investigasaun sientifika ida hodi tulun autoridade judisiariu sira iha prosesu penal nian. Nune'e PSIK bele atua tuir ninia natureza no nia misaun ne'ebé atribui ba sira iha ambitu investigasaun krime grave, organizada ka kompleksa.

Presedente ba Institusaun seluk

Konsellu Ministru aprova ona pedidu PSIK nian ho Diploma Ministerial N.º 33/2017 de 24 de Maio Aprova o Tipo e o Calibre das Armas de Fogo de Serviço do Pessoal da PCIC no daudaun ne'e sosa ona kilat tamba ejijensia servisu nian iha terenu ka risku sira bainhira hala'o servisu. Perguntas ba ita hotu, serake ejijensia ne'e ita tenke aprova lalais diploma ruma hodi sosa armas?

Mentalidade husu funu naruk ka konflitu armadu ne'ebé Timor-Leste hakat liu, no to'o agora seidak rekopera lolos husi trauma. Ninia konsekuensia ita forma institusaun kiik ka boot tenke ho armas. Nune'e mos ita rezolve violénsia sempre ho violénsia. Iha sorin seluk, tinan-tinan efeitu husi utiliza sala armas sai preokupasaun boot no rezulta vitima kanek, mate no trauma husi armas ne'ebé sosa ba institusaun sira Estadu nian. Problema ida ne'e to'o agora seidak rezolve ho diak, iha tempu hanesan ita harii institusaun foun sira ho armas. Aprende husi akontesementu sira iha pasadu kona-bá utiliza sala armas no kontrola armas. Exemplu iha fulan Novembru 2018 kazu Kulu-Hun – Dili, ema na'in tolu mate no na'in lima seluk kanek tamba konsekuensia husi utiliza sala armas no armas ne'ebé deskontroladu. Ne'e hanesan exemplu ida katak institusaun sira ne'ebé harii kleur ona, ne'e mos sei nafatin problema ho kontrolu ba armas no dalabarak utiliza sala.

Tanba ne'e, institusaun foun hanesan PSIK foin estabelese mekanismu no prosedementu sira no la iha esperiensa no nosaun utiliza armas no nia kontrolu sira, armas ne'e rasik sei sai risku no ameasa. Tetu ba risku sira ne'e, ho populasaun Timor-Leste ne'ebé ho deit 1.2 milaun (Sensus 2015), institusaun hotu-hotu la'os tenke forma ho armas. Nomos número armas ne'ebé iha, labele hanesan ho número populasaun.

Ida ne'e mos hanesan presedente aat ida no ba futuru – institusaun investigasaun sira no seguransa sivil sira hanesan Komisaun Anti Korupsaun (KAK), Autoridade Aduaneira ka Alfândega, Guarda Florestal, Guarda Municipiu Dili, Guarda Prizional, Migrasaun no Dirasaun Nasional Seguransa Patrimoniu Públiku (DNSPP) sei ejije atu hola tan armas tamba hotu-hotu servisu iha risku nia laran. Posibilidade ida ne'e sei akontese tamba

⁶ Relatório Fundasaun Mahein (2018). Krime Organizado Haboot Tan Nia Rede Iha Timor-Leste. Disponivel iha ne'e: <http://www.fundasaunmahein.org/wp-content/uploads/2018/01/MNL-129-PDF.pdf>

institusaun hirak ne'ebé temi iha leten ne'e balu simu ona treinamentu kona-bá utiliza armas hanesan KAK no Alfândega.

Ho ida ne'e, bainhira kilat aumenta, possibilidade vitima ba efeitu husi kilat sei aumenta mos. Populasaun sira sei sai alvu ba armas hirak ne'e tamba lisaun sira ne'ebé hatudu pesoal seguransa sira ne'ebé ho armas dalabalu utiliza poder no armas ne'ebé iha hodi halo ameasa, intimidasaun no rezolve problema ne'ebé sira hasoru.

Armas ne'ebe Sosa ona ba PSIK

Desde tinan 2017 diskusaun naruk ligadu ho polítika sosa armas ba PSIK tamba tetu ba mekanismu no prosedementu utilizasaun nian nomos ninia risku sira. Ikus mai Governu diside sosa armas ba PSIK. Armas sira ne'ebé sosa ba PSIK to'o ona iha Timor-Leste iha inisiu fulan Dezembru 2020. Maske nune'e, munisoens no asesores sira ne'ebé sosa hamutuk ho armas ne'ebé nia distinu ba PSIK to'o uluk ona iha fulan Setembru 2020. Hanesan temi ona iha Diploma Ministerial N.º 33/2017 de 24 de Maio tipu kalibre arma fogu ne'ebe aprova ba PSIK maka Pistola Kalibre 9x19 mm. Nune'e iha inisiu fulan Dezembru 2020 armas refere to'o ona iha Timor-Leste liu husi Aero Portu Internasional Prezidente Nicolau Lobato ho Aviaun Air North.

1. Armas/Pistola

Tuir *Shipment List* ne'ebé FM asesu armas ne'ebé distinu ba PSIK hamutuk 75 (hitu nulu resin-lima) ho marka Glock 19 no nia aparelu sira hanesan *Magazine Pouch* hamutu 75 (hitu nulu resin-lima) nomos *Holster Sport/Combat* hamutuk 75 (hitu nulu resin-lima). Fotografia kraik ne'e, membru husi Autoridade Aduaneiru (Alfândega) ho PSIK halo hela verifikasaun ba armas ne'ebé nia distinu ba PSIK bainhira to'o iha Aeroportu Internasional Prezidente Nicolau Lobato Dili iha inisiu fulan Dezembru 2020.



Foto: Fundasaun Mahein, 2020

Tuir *Shipment List* armas ne'ebé distinu ba PSIK ho nia númeru serie husi pistola 75 (hitu nulu resin-lima) maka hanesan tuir mai ne'e:

Pkg.	Pos.	Item (Númeru serie)	Quantity
1	5	47255 Glock 19 9x19 pistol set (Gen5/MOS/FS) BNRM603-BNRM612	10
2	5	47255 Glock 19 9x19 pistol set (Gen5/MOS/FS) BNRM613-BNRM622	10
3	5	47255 Glock 19 9x19 pistol set (Gen5/MOS/FS) BNRM623-BNRM632	10
4	5	47255 Glock 19 9x19 pistol set (Gen5/MOS/FS) BNRM633-BNRM642	10
5	5	47255 Glock 19 9x19 pistol set (Gen5/MOS/FS) BNRM643-BNRM652	10
6	5	47255 Glock 19 9x19 pistol set (Gen5/MOS/FS) BNRM653-BNRM662	10
7	5	47255 Glock 19 9x19 pistol set (Gen5/MOS/FS) BNRM663-BNRM672	10
8	5	47255 Glock 19 9x19 pistol set (Gen5/MOS/FS) BNRM673-BNRM677	5
Total			75

Fonte: Rezultadu peskiza Fundasaun Mahein, 2020

2. Asesorias

Husi armas 75 (hitu nulu resin-lima) ne'e sei kompleta ho nia asesorias 4 (haat) hanesan iha kraik ne'e:

QTY	SKU	Name	Unit Price	Amount
4	MIC-R04-ADV / 01	MIC-R04-ADVANCED KIT Advanced accessories kit for Micro-Roni 17/19: Micro-Roni4, BGR-BGF, MICROCASE, MRFL, NBSS+OPS, 1RH (color: black)	EUR302.00	EUR1,208.00
Subtotal				EUR1,208.00
Shipping and Handling				EUR88.00
Total				EUR1,296.00



Foto: Fundasaun Mahein, 2020

3. Munisoens

Husi asesories 4 (haat) ne'ebé deskreve iha leten hamutuk ho munisoens ne'ebé partensia ba armas 75 (hitu nulu resin-lima) to'o uluk ona iha Timor-Leste iha inisiu fulan Setembru 2020 hanesan hatudu iha kraik ne'e:

CARGO MANIFEST									
I.C.A.O. ANNEX 9, APPENDIX 3									
Operator: EUROATLANTIC AIRWAYS S.A.				Flight NBR. YU 671			Date: 20Sep20		
Marks of Nationality and Registration: CSTKR				Point of Unloading: DIL DILI					
Point of Loading: LIS LISBON									
AIRWAYBILL N°	NBR OF PCS	NATURE OF GOODS	FOR USE BY OWNER OPERATOR ONLY				FOR OFFICIAL USE ONLY		STATUS
			SPECIAL CARGO	GRS WEIGHT KGS	ORIG	DEST			
DQF815ZMMZ									
551-40125260	1/1	HUMAN REMAINS	HUM	120.00	LIS	DIL	DSS 20PT00001530093305	17SEP	T1
551-40130123	1/1	HUMAN REMAINS	HUM	99.00	LIS	DIL	DSS 20PT00001530093313	17SEP	T1
ULD TOTAL	2			219.00					
PMC0557YU									
551-40126472	6/6	CONSOL	ELI HEA	588.00	LIS	DIL	NRM 20PT00001526582004	17SEP	NRM
							20PT00001526582202	17SEP	NRM
							20PT00001526582253	17SEP	NRM
							20PT00001526580648	18SEP	
551-40126483	2/2	PERSONAL EFFECTS		15.00	LIS	DIL	NRM 20PT00001526618012	18SEP	X
551-40127511	1/1	AMMUNITIONS	RMS	227.00	LIS	DIL	NRM 20PT00001526693338	18SEP	X
ULD TOTAL	9			831.00					
PAGE TOTAL	11			1050.00					5 SHPTS
GRAND TOTAL	11			1050.00					5 SHPTS
Prepared by: MARCO									
								Page 1/1	

Fonte: Rezultadu peskiza Fundasaun Mahein, 2020

Regra Uza Forsa no Armas

Haktuir dispozisaun artigu 20 Decreto-Lei N.º 21/ 2014 de 6 de Agosto 1.ª Alteração ao Decreto-Lei n.º 15/2014, de 14 de Maio, Orgânica PCIC nian no Diploma Ministerial N.º 33/2017 de 24 de Maio Aprova o Tipo e o Calibre das Armas de Fogo de Serviço do Pessoal da PCIC kona-bá utilizasaun armas sei regula tuir Dekretu-Lei n.º 43/2011 Rejime Jurídiku Uzu Forsa nian.

Nune'e tuir dispozisaun artigu 26 no 34 Decreto-Lei N.º 21/ 2014 de 6 de Agosto 1.^a Alteração ao Decreto-Lei n.º 15/2014, de 14 de Maio, Orgânica PCIC determina kriausaun prosedementu propriu ba pesoal PSIK sira kona-bá garantia disiplina no funsionamentu uzu no forte armas.

Husi dispozisaun legal temi iha leten ne'e aprova ona regulamentu kona-bá utilizausaun forsa, uzu no forte armas ba pesoal PSIK sira. Iha ne'ebé Diretor PSIK Dr. Vicente Fernandes e Brito aprova ona regulamentu ne'e iha loron 12 Julu 2018⁷.

Nune'e iha sesaun ne'e sei ezamina deit regulamentu sira kona-bá distribuusaun arma fogu no utilizausaun forsa no armas fogu ne'ebé regula pesoal PSIK sira iha atuusaun polisial nian tuir Regulamentu Utilizausaun Forsa, Uzu no Forte Armas Fogu.

1. Distribuusaun, uza no forte armas

Tuir artigu 3 Regulamentu Utilizausaun Forsa, Uzu no Forte Armas Fogu, membru PSIK ne'ebé iha direitu uza no forte armas fogu maka autoridade polísia kriminal, pesoal investigasaun kriminal no pesoal auxiliar investigasaun kriminal. Ninia utilizausaun tenke hetan aprovasaun husi Diretor Nasional maibe pesoal sira ne'ebé utiliza tenke hetan ona kursu deformausaun utilizausaun armas fogu ne'ebé realiza husi sentru formausaun polisial.

Nune'e mos pesoal PSIK sira ne'ebé temi iha leten ne'e utiliza armas fogu tenke livre husi prosesu disiplinary no kriminal. Katak pesoal ne'ebé hetan prosesu disiplinary no kriminal bandu atu utiliza no forte armas fogu. Sira ne'ebé utiliza no forte arma fogu tenke sujeita ba avaliausaun no verifikausaun habilidade individual husi Departamentu Armamentu no Seguransa. Inklui iha periodu sira férias nian bandu autoridade polísia kriminal, pesoal investigasaun kriminal no pesoal auxiliar investigasaun kriminal uza no forte armas fogu.

Iha âmbito distribuusaun armas fogu (dispozisaun artigu 5) ba autoridade polísia kriminal, pesoal investigasaun kriminal no pesoal auxiliar investigasaun kriminal, obrigatoriamente, liu husi nia superior sira, entrega pedidu ofisial ba Departamentu Armamentu no Seguransa hodi halo ezame ka teste no enke prenxe mos formulariu rejistu nian. Bainhira rekolla no entrega armas fogu tenke ho prezensa fizika pesoal identifikada iha formulariu rejistu no bandu delega ba parte terseiru.

Proibisaun/bandu seluk (dispozisaun artigu 6) kona-bá uza no forte armas fogu iha exercisiu funsaun hanesan polísia bainhira ho kondisaun lanu liu 1,2 mg alkool por litru iha ran. Bandu mos pesoal PSIK sira bainhira hala'o sira nia funsaun hanesan polísia labele hatudu armas fogu ba ema seluk maske iha situausaun halimar.

2. Uza forsa no armas

Pessoal PSIK sira uza forsa tenke hala'o tuir Dekretu Lei N.º 43/2011 de 21 de Setembru Rejime Jurídiku Uzu Forsa nian. Uza forsa atu halo deit defeza ba sira nia-an ka ema seluk, hodi duni agresaun ruma hasoru integridade fizika pessoal PSIK ka sidadaun ruma. Rekursu uza forsa ho arma fogu, admite deit bainhira meus hotu-hotu la bele ona,

⁷ REGULAMENTO DA UTILIZAÇÃO DA FORÇA, USO E PORTE DA ARMA DE FOGO AO PESSOAL DA POLÍCIA CIENTÍFICA DE INVESTIGAÇÃO CRIMINAL. Dia 12 de Julho de 2018

imposível ka insuficiente. Pessoal PSIK labele obriga ka uza meius obrigatōriu liu fali buat ne'ebé nesesariu⁸.

Tuir artigu 4 Regulamentu Utilizasaun Forsa, Uzu no Forte Armas Fogu kona-bá prosedementu tiru arma fogu no utilizasaun forsa no tiru iha atuasaun polisial hanesan rekursu ikus liu ka bainhira meius seluk la suficiente ona. Nune'e atu tiru iha atuasaun polisial tenke hala'o tuir maneira sira: *primeiru* – avizu verbal; *segundu* – atuasaun la ho ekipamentu sira defeza polisial; *terseiru* – atuasaun ho arma fogu ne'ebé la hamate (*não letal*) tuir estandarizasaun PSIK nian; *kuartu* – atuasaun ho arma fogu ka meius rekursu seluk hodi kontrola kriminozu hodi minimiza vida pesoal PSIK nian ka parte terseiru.

Iha âmbito prosedementu atuasaun ho armas fogu bainhira iha situasaun ameasa nia laran ka agresaun ilísita, parte kriminozu la koopera ho polísia bainhira ezejuta hela ordem, bainhira kriminozu kaer hela armas, ka iha situasaun seluk ne'ebé meius hotu-hotu la rezolve ona no tenke utiliza duni armas. Bandu pesoal PSIK sira labele tiru arbiru ka tiru advertensia iha situasaun saida deit ka bainhira la iha nesesidade.

Iha kazu sira pesoal PSIK ne'ebé autoriza uza forsa no uza armas fogu iha asaun polisial no hala'o tuir prosedementu sira, iha direitu protesau judisiária iha nivel institucional (artigu 7). Maibe pesoal PSIK tenke responsabiliza ba aktu sira ne'ebé fora husi regulamentu utilizasaun forsa no armas fogu nian tenke submete ba prosesu disciplinar no kriminal. Nune'e mos superior sira tenke responsabiliza ba ordem ne'ebé nia hasai iha atuasaun polisial nian iha kazu sira utilizasaun forsa no armas fogu.

Rekomendasaun

Desizaun Governu nian, pratikamente armas iha ona PSIK nia liman, ho mekanismu sira kontrolu nian ne'ebé estabelese daudauk tenke rigor mos iha ninia implementasaun bainhira utiliza armas iha asaun sira polisial nian. Maske parte barak la aseita ho desizaun ne'e. Nune'e FM rekomena:

1. Parlamentu Nasional kontinua halo funsaun sira fiskalizasaun nian ba servisu tomak PSIK nian, liu-liu utilizasaun armas no auditoria anual ba armas ne'ebé PSIK utiliza.
2. Ministériu Justisa no Superior sira PSIK nian aplika ho rigor kona-bá regra ka regulamentu distribuisaun, uza no forte armas nian hodi prevene hahalok sira ne'ebé bandu iha regulamentu utilizasaun nian durante asaun sira polisial nian no la sai hanesan ameasa ba institusaun seluk no populasaun sira.
3. Públiku tomak no Provedoria Direitu Humanus no Justisa (PDHJ) kontinua tau matan hanesan kontrolu externa ba armas 75 (hitu nulu resin-lima) ne'ebé daudaun ne'e iha PSIK nian liman no utiliza deit tuir Lei no regulamentu sira.

⁸ Haree mos Diploma Ministerial N.º 33/2017 de 24 de Maio Aprova o Tipo e o Calibre das Armas de Fogo de Serviço do Pessoal da PCIC



Bibliografia

Decreto-Lei N.º 21/ 2014 de 6 de Agosto 1.ª Alteração ao Decreto-Lei n.º 15/2014, de 14 de Maio, Orgânica Polícia Científica de Investigação Criminal (PCIC)

DECRETO DE LEI N.º 43 /2011 de 21 de Setembro Regime Jurídico do Uso da Força

Diploma Ministerial N.º 33/2017 de 24 de Maio Aprova o Tipo e o Calibre das Armas de Fogo de Serviço do Pessoal da Polícia Científica de Investigação Criminal (PCIC)

REGULAMENTO DA UTILIZAÇÃO DA FORÇA, USO E PORTE DA ARMA DE FOGO AO PESSOAL DA POLÍCIA CIENTÍFICA DE INVESTIGAÇÃO CRIMINAL. Dia 12 de Julho de 2018

Relatório Fundasaun Mahein (2019). Sosa Kilat ba PSIK Atu Tiru ka Investiga? Disponivel iha ne'e: <http://www.fundasaunmahein.org/2019/05/16/sosa-kilat-ba-psik-atu-tiru-ka-investiga/>

Relatório Fundasaun Mahein (2018). Krime Organizadu Haboot Tan Nia Rede Iha Timor-Leste. Disponivel iha ne'e: <http://www.fundasaunmahein.org/wp-content/uploads/2018/01/MNL-129-PDF.pdf>

Relatório Fundasaun Mahein (2014). Política Kriasaun Polísia Sientífika Investigasaun Kriminál (PSIK) Parseiru no Ameasa ba Instituisaun Siguransa. Disponivel iha nee: http://www.fundasaunmahein.org/wp-content/uploads/2014/09/MNL_Nu.86_25092014_PSIK.pdf